



Tir Yimiyim

www.tirymiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymiyim@gmail.com

TAPAK 8 Yangia anidakangma : Tir Yimiyim tirymiyim@aolima tir yimiyim TAPAK 7



Linük nung azütokshiba anendaktsütsü: Afghan tir Ghani

August 30 nü Sonia Gandhi leniba nung opposition senden amentsü



VOL. XVIII NO. 302 (ADOK 302) DIMAPUR AMUNGNÜ (SUNDAY) LUROI (AUGUST) 15, 2021 ₹ 5.00

COVID-19 Nagaland: 61 dak putet, 124 tanepsü angu & 3 asü

Kohima, August 14, 2021 (TYO): Honibarnü Nagaland nung nisung 61 dak COVID-19 aliba putet aser 124 tanepsü angu.

"Tanü COVID-19 puteta alir nisung 124 tanepsü angu. Parnokji Tuensang nung 36, Mokokchung nung 30, Kohima nung 29, Dimapur nung 10, Longleng nung 7, Phek nung 6, Peren nung 4 aser Wokha nung 2 lir" ta Integrated Disease Surveillance Project atema State Nodal Officer, Dr Nyanthung Kikon-isa.

Parnok züngsema nisung 26,388 tashi tanepsü nguogo aser ibaji 90.7% lir.

"Honibarnü nisung 61 dak COVID-19 aliba putet. Parnokji Dimapur nung 34, Kohima o Mokokchung nung terkaka (11), Peren nung 2 aser Kiphire, Wokha o Zunheboto nung kaka (1) lir" ta paisa metetdaksü.

Tang Nagaland nung COVID-19 puteta alir nisung 1,278 anepaludar.

Honibarnü COVID-19 puteta alir nisung 3 asü. Parnokji Dimapur nung 2 aser Kohima nung 1 liasü.

Nagaland nung I-Day benjung live sayutsü

Dimapur, August 14, 2021 (TYO): Nagaland Civil Secretariat Plaza, Kohima nung 75 buba Independence Day benjung amongba live sayutsü.

August 15, 2021 anepdang 8:45 ako nungi MyGovNagaland indang YouTube Channel nung iba sentong sayutsü.

DoSE kübok 'State Centre of Nagaland Languages' lapoker

Dimapur, August 14, 2021 (TYO): Directorate of School Education kübok "State Centre of Nagaland Languages" lapoker, ta Principal Director Shanavas C, IAS-i

Dimapur nung Rs 40 lakh auyar ka apu



Dimapur, August 14, 2021 (Agencies): Assam kübok Golaghat district nung alir kati Dimapur nung office ka nungi Rs 40 lakh auyaba atema puogo.

Golaghat district kübok Dhodhang nung Mintu Tanti-i Kalibari road, Dimapur nung nija office ka kakkoka atu aser Rs 40 lakh bener ajen, ta Adml. Dy. Commissioner of Police (Crime) & PRO, Dimapur-i sangdong ka nung ashi.

Pa apuba sülen Rs 28,1600 tashi Thuramukh yim nung ngutetogo,

Tanü asürtem züngsema tasür ajak agi 597 kümogo saka nisung 14 bo tanga tashidak ajanga asü, ta Dr Kikon-isa ashi.

"Tang tashi nung COVID-19 alitsü akok ta temolung meleme bilemba sample 288,497 tendangogo. RT-PCR ajanga 104,894, TrueNat ajanga 71,142 aser Rapid Antigen Test ajanga 112,461 tendang" ta Dr Kikon-isa metetdaksü.

"Nagaland nung nisung 638,93 nem COVID-19 vaccine indang dose 3807,080 agütsüogo" ta State Immunization Officer, Dr Ritu Thuria ashi.

Vaccine agirtemji frontline workers 60,838, healthcare workers 15,985, arishi küm 45 ser tempur 189,449 aser arishi küm 18 nungi 44 tsüingda alir 372,661 lir, ta paisa ashi.

"Vaccine agirtem rongnung nisung 168,147-i dose anaprong agiogo. Parnokji frontline workers 42,095, healthcare workers 12,734, arishi küm 45 ser tempur 107,777 aser arishi küm 18 nungi 44 tsüingda alir 5,541 lir" ta Dr Thurr-isa metetdaksü.

AKM-i ayongzüka 75 buba Naga Nüchiso Anogo bilemteta amung

Mokokchung, Aug 14 (TYO): Ao Kaketshir Mungdang (AKM)-i ayongzüka 75 buba Naga Independence Day bilemteta sentong tajung ka parnok office complex nung meraketa mungogo. Iba sentong nung AKM ketdangsürtem den AKM kübok aliba unit balala nungi ketdangpurtem arua aden.

Sentong nung taoba Naga Students' Federation (NSF) tir, Imchatoba Imchen-i Naga Independence Day amungba ratet lemsatpdang, iba ya shinga anema amungerba masü saka Naga nung ka ta sayuba den Naga nung otsü aser temeten

Ao Senso Telongjem Dimapur-i jangjashitsür

Dimapur, August 14, 2021 (TYO): Taoba mapang osangkaket kar nung Naga Council, Dimapur (NCD) dak sendakba osangtem adokba nung Ao Senso Telongjem, Dimapur (ASTD) tenung tetshiba atema ASTD-i jangjashitsüogo.

ASTD mesüra Meren Longchar nungeri Dimapur Tribal Hoho Forum (DTHF) mesüra kin 5 hoho tem mesüra tangar shinga danga sentsüh kecha mali. ASTD-i NCD dak alaka DTHF ta ajaba telok kübok madener aser magizüker kechiyong DTHF-i NCD anema inyaker, ta ASTD-i sangdong ka nung ashi.

ASTD dena 1949 küm NCD tentet aser iba mapang nungi NCD-i Dimapur nung alirtem asoshi inyaka arur. Tesüiba mapang NCD den mangatetep adokba ajanga okadak ken o benoka jembiba ASTD-i

Iba nija office nung private security guard Semson Ronghang-ia sen auyaba nung yaritepba atema puogo.

Iba dak sendakba nung Sub-Urban Police station, Dimapur nung FIR ka benokogo.

GPRN/NSCN-i 75 buba Naga Independence Day among

Dimapur, August 14, 2021 (TYO): GPRN/NSCN-i Honibarnü council headquarter, Khehoyi nung 75 buba Naga Independence Day among.

"August 14 nü asenoki Naga lima kümteba bilemteta benjungteper. Working Committee (WC), Naga National Political Groups (NNPGs)-i shitak shimtsüba aser telemteba agitsü tangatetba nung "Agreed Position" (Preamble Agreement) nungi masetshii noktaka lir" ta tanü Ato Kilonser, N Kitovi Zhimomi-i ashi.

"Küm ana tashi yimtenren olemtepa aruba sülen MLA tem, kin hohotem aser Civil society tem ket nung status paper lir. WC, NNPGs-i tarutsü Indo-Naga yimtenren aser ketdangsübaren inyaka aotsü indang sentong nübortem dang sayuogo. Iba nung 14, August

AKM-i ayongzüka 75 buba Naga Nüchiso Anogo bilemteta amung

wazüka ayutsü aser alima dang teimla osang peroktsü asoshi amunger, ta metetdaksü.

Naga nung ya libuyimpur (indigenous) nisungtem lir aser libuyimpur nisungtemji kechisarena ajak nung tangar dang nungi balaka lir, anungji, temeten asoshi maneni jembitsüla, ta pai ashi.

Naga yimden tebilemtsüji Aor kisüngi makoktsü, anungji, tangar den lenjii oa küla medema aotsübaji kanga tongtibang aser asenokia iba wadang asoshi akokba tashi shilem agitsüla, ta paisa tayongzüka agitsü.

Iba dak sentakba nung paisa

1947 tanüla mesamai lir" ta paisa metetdaksü.

"GPRN/NSCN ya nübortem indang sorkar ka lir aser iba ya Working Committee (WC), Naga National Political Groups (NNPGs) nung tongti shilem ka lir. WC, NNPGs-i onok sasep nung dang masü saka Naga kin hohotem, GBs aser civil society tem den kasa aser tashishitsü melii alitsü tangatetbatem agizükogo. Tesüiba küm pezü tsüingda Indo-Naga yimtenren mapa nung temelenshi tajung aika adokogo" ta paisa ashi.

"WC, NNPGs-i tanü Naga nung atema tajungtiba ta asüba tangatetba nung Nagaland kintem, GB aser Civil Societies den yariteper. India sorkar aser WC, NNPGs tsüingda molungtepa nung Naga nungeri pei putiotsü aser maitsü kümzüka ayutsüba dena lir. Iba

AKM-i ayongzüka 75 buba Naga Nüchiso Anogo bilemteta amung

ya Naga nung ajak atema tajangzüka tulu lir" ta Ato Kilonser, Kitovi-isa metetdaksü.

"WC, NNPGs-i tashishitsü melii inyaksü. Onoki Naga kintem dang kecha mimiimshitsü. Onok kija agi Naga nung tarutsü atema telemteba magitetsü. Onok Nagaland atema inyaker aser iba jagi yimtenren olemtep tenzüka anogo nungi onoki kin hohotem aser sobaliba rejutem dang asüingdangyatsü tenzüka" ta paisa ashi.

Prime Minister Narendra Modi lenisüba kübok India sorkari Indo-Naga yimten tebilemtsü atema telemteba ka agitsü imlar. October 31, 2019 nü Indo-Naga yimten olemtep tembangogo anungji India sorkari mapang atsülangba ya nübortem ashioksüba lir ta angateta tekaratiba nung yimten latetsüla, ta Kitovi-isa ashi.

ya Naga nung ajak atema tajangzüka tulu lir" ta Ato Kilonser, Kitovi-isa metetdaksü.

"WC, NNPGs-i tashishitsü melii inyaksü. Onoki Naga kintem dang kecha mimiimshitsü. Onok kija agi Naga nung tarutsü atema telemteba magitetsü. Onok Nagaland atema inyaker aser iba jagi yimtenren olemtep tenzüka anogo nungi onoki kin hohotem aser sobaliba rejutem dang asüingdangyatsü tenzüka" ta paisa ashi.

Prime Minister Narendra Modi lenisüba kübok India sorkari Indo-Naga yimten tebilemtsü atema telemteba ka agitsü imlar. October 31, 2019 nü Indo-Naga yimten olemtep tembangogo anungji India sorkari mapang atsülangba ya nübortem ashioksüba lir ta angateta tekaratiba nung yimten latetsüla, ta Kitovi-isa ashi.

AKM-i ayongzüka 75 buba Naga Nüchiso Anogo bilemteta amung

AKM nem inyadaksünüba ka ashidang, Naga yimden temeten atema küm talangka rarayonga arudang, Naga nungeri linük asoshi bendanga agütsüba, timtem touthi aser rishikangshi ajangshibatem tarutsü lanu putu asoshi bendena yutsüet nungbo kanga ajungtsü aser iba mapaji otsüsütsü ka asütsü, ta tebilemba lemsatetep.

AKM tir, Nungdokyanger Ao-ia sentong nung shilem agia liasü. Iba sentong moaja Mokokchung Town Baptist Arogo (MTBA), Associate Pastor, Rev. P. Chuba Jamir-i sarasademtsü.

AKM nem inyadaksünüba ka ashidang, Naga yimden temeten atema küm talangka rarayonga arudang, Naga nungeri linük asoshi bendanga agütsüba, timtem touthi aser rishikangshi ajangshibatem tarutsü lanu putu asoshi bendena yutsüet nungbo kanga ajungtsü aser iba mapaji otsüsütsü ka asütsü, ta tebilemba lemsatetep.

AKM-i ayongzüka 75 buba Naga Nüchiso Anogo bilemteta amung

memetet aser NCD putiotsü nung okadaki ken o abenba mesüra print media dangi aoba mali, ta ASTD Tir Meren Nokpu aser Tezülur P. Sashi Longchar nati sangdong nung ashi.

ASTD-i NCD nung züngsemtsü atema shimteter yokba nisung anati Councilor ama tezüngzüktep agia mapa inyaksü tenzüka aser ASTD nem osang kecha mesangoktsüi 2020 küm tenati tangar kar den külemi NCD anema Civil Court nung ken o ka benoka liasü. ASTD tenung nung Councilor anati tim mesüi inyakba aser yimjak nung ASTD tenung menüksüba atema ASTD-i tenaprong Councilor nungi anendaktsü, ta ASTD mendenpurtemi ashi.

Shia metetertem aliba Naga loktiliba ka asünung züngsem kari obang meputep adokra timi angatetteptsüla. Ano, NCD indang Constitution nunga temelenshitsü lira melenshitsü

akok. NCD nung kin 19 dena lir aser iba nungi nisung kari dang NCD anema noktaker aser MOU ta ajaba amshia ASTD-a iba ken o nung dendaktsüogo. Ajisüaka, ASTD ya NCD nung züngsem ka dang asünung NCD nung dena aliba tanga kintem asoshi inyaksü indang tebilemtsü khuret kecha mali. Ano külen, NCD sasep nung adokba ken o tem okadaki mesüra print media dangi moi NCD-i angatetteptsü koka lir ta ASTD-i amanger, ta sangdong nungsa shia lir.

Nisung telok kati Memorandum of Understanding (MOU) ta ajaba nung ajemdaker yimjak nung Ao Senso Telongjem, Dimapur (ASTD) tir Meren Longchar tenung tetshir. Parnoki ashiba MOU ya yimjak nungbo mesayur aser iba jagi nisungtem ratadaksür. Anungji ajaki MOU nung zülua aliba metettsü atema tsüinglanglen agütsür, ta ASTD-isa ashi.

WWII USAAF tayimtsü Molungkimong nung tsükokdang asürtem bilemtetba sentong aka



Molungkimong, Luroi/ August 14 (TYO): Molungkimong Putu Menden-i ayongzüka August 11, 1944 World War mapang United States Army Air Force Tayimtsü nung sepaï parnok 12 mener tsükokba bilemteta 77th Anniversary sentong yanglua munga liasü.

22nd December 2020 anogo tayimtsü tsükokba tesem nung Molungkimong Village Council ajanga tasürtem nüngtem nung Nüngshilong ka azünga ayu, aser kesa tesem nung Memorial sentong agia liasü.

Iba tayimtsü ya F-7A Photo Reconnaissance Liberator liasü aser Tail Serial No.ji. 42-64189.

August 11, 1944 iba tayimtsü ya 'Combat Mission' atema Jorhat, India nungi apusoa 'The Hump' Aluminium Trail lenmang ajanga Kunming, China-i apusoba liasü, saka Hump trail len nungi tayimtsu nung technical snag adoker meyipa arudang Molungkimong nung tsükoka parnok 12 prongla taküm sama. Iba tayimtsü ya 24th Combat Mapping Squadron indang liasü aser parnok base-ji Gushkara, West Bengal liasü aser parnok mapa nukjidongji tayimtsü teyimdak nung azük nungi tsükchirtem aliba tesemtem noksa tangoka rara nung tongtibang mapping mapa inyaka liasü. Crash report ajanga ashiba agi tayimtsü nung crew members 9 aser passenger 3 ta mena liasü, aser tayimtsü nung tongtipang cargos gasoline, bomb aser prangpong injang bena liasü.

WWII nung CBI (China-

Burma-India) Theater-ji reprangdangra China limaji Japan nung sepaitemi amokbanger liasu. Anungji, China nung sepaï aser China nung amenoka aliba America nung sepaitem dangi nungdakba supplies temji Himalayan Mountain ajanga 550 miles Air route Assam Airfields nungi tenzüka Kunming, China tashi tayimtsü ajanga belen. Altitude, aser tsüngsang mopung kanga majungba den Japan nung sepaitem aliba ajanga iba lenmang ya lendongbang nung liasü. Iba Air route ya 'The Hump' ta American Pilots temi jatsü. Iba Hump nung tayimtsü 700 dak tali tsükok aser nisung 1,200 shi taküm sama aser tanu tashi temang aika mangur. Anungji iba tesem dang "The Aluminium Trail" ta aja.

Chick Marrs Quin's indang kaket, "The Aluminum Trail" nung Molungkimong nung tsükokba tayimtsu indang report tatsüka aguja aliba nung Molungkimong nungeri American Search Operation party 24 August 1944 anogo atudang chiyongtsu agüja anepaluba aser tasürtem temang pezü (4) dang ngutet aji Christian yimya nung kangki nung zülü zulur songa yutsuba mapatemji ngüa, ya tenem kin nisung kolak bushirtemi ya tashi inyakbaji meyimlaba mapa ta zülüja angutsü. Kasa kaket nungsa kangki nungji zülüja aliba o tajung indang shisema lir: "The noble and brave men of America, like the stars of heaven of their lives, leaving

their sweet homes, sacrifice their lives for our country in the falls of this happy shining stream."

Mr. Talimeren Tzüdïr (Retired Indian Navy Petty Officer), pai kanga meranga küm aika bushisüngdang sür tayimtsü aser asürtem 12 indang osang tejangja nguteta America nung kinüngertem dang metetdakja arudagi. Aser tan Memorial service amungdanga parnok arua metentetaka, parnokia shilem agia memorial O tajung yokba den naro inokdakja liasü. America nung aser ano kinungertemi "India nung dang aser talisa Molungkimong Village Council dang yamala sendong tajung mungtsüba atema kanga pelalaba den tetushi tulu agütsüba" ta shioka liasü. Talisa "kum 76 süiaka par kinungertemi par adianü kolen taküm sama aji memeti aliba metetbaji par nisung par limai aser pei kidangi meyipa shilangogo ni" ta tepelaba shisem.

Mapa tilaka dang süaka, tayimtsü tsükokba tesem nung memorial plaque azüngba den ano 77th Crash Anniversary mungtsüba osangtem meteta USA nung American War Memorials Overseas Inc. ajanga parnok researcher ka nem iba crash tesem Registration mapa tenzüksü nongloktsüogo.

August 11, 1944 anogo parnok terana (12) taküm tenlartem tenung yamai: 1st Lieut. James T. Caraway (Pilot); 2nd Lieut. Raymond Kurzwaski (Navigator); 2nd Lieut. Daniel S Longfellow (Co-pilot); Captain. Joseph E Haynes; Master Sgt. George B Abbott; Technical Sgt. Glenn B Carnes; Staff Sgt. Leon M Winslow; Staff Sgt. Walter H Jones; Staff Sgt. Alford H Gray; Sgt. AD Whaley; Sgt. Emery D Crouch, aser Corporal. Jerome B Brenner.

Ano Molungkimong Village Council ajanga WWII Memorial Development Committee ka shimogo aser iba committee ajanga WWII Museum and Research Center ka yanglutsü nukjidong yur mapa tenzüko.

NSCN/GPRN (R)-i 'Khukhu' benjung salem lemsatep

Dimapur, Luroi/August 14 (TYO): NSCN/GPRN (Reformation)-i sangdong ka ajanga Chakhesang nungertem den 'Khukhu' benjung salem lemsatepogo, koba August 16 nü amungtsü.

Khukhu benjung ya tetsürtem atema benjung ka lir, kong kibong nung tesendaktep tali akangshitsü atema tetsürtem nem chiyongtsü balaka renemer agütsür.

Benjung anogo nung

tetsürtem parnok asoshi rementsüba chiyongtsütem chia jemer anogo tepeyong benjungtepa amunger.

Tesendaktep tajungba küma yanglushitsü atema benjung ayongzüka amungba ama, Chakhesang nungertemi tetsürtem den tesendaktep tajungba küma yanglutsü aser kasaji Naga nungersütsünda-a tesendaktep takangba küma yanglutsü tamang akaba, NSCN (R)-isa lemsatep.

Dibuia yimtsüng nung training sentong ka agi

Dimapur, Luroi/August 14 (TYO): MOVCD-NER-III kübok plant protection techniquesin organic farming dak sendakba nung August 13 nü Sub-divisional Agriculture office, Mangkolemba kübok Dibuia yimtsüng nung training sentong ka agia liasü.

Shisalen agütsür Nungsang Imchen A.I.-i, organic management system nung

tekümsükba jenjang balala agitsüba indang metetdaksü. Paisa, Alu nung shiru tilala aser tsünüsenpongtsü nung ara balala atuba aziüoktsü atema chemical amshitsü melena cultural, biological aser mechanical inyakyim aser plant based insecticide tem amshitsü koda tongtibang iba indang lemsatep. Iba training sentong nung aluyimer 35-i shilem agia liasü.

Dimapur Police-i Two Wheeler Rally ka ayongzüka agi



August 14 nü "Two wheeler Rally for Road Safety" sentong nung shilem agirtem tangokba noksa nung angur.

Dimapur, Luroi/ August 14 (TYO): India nüjiso ngur küm 75 ajungba 'Azadi ka Amrit Mahotsav' nüngtem nung Dimapur Police-i August 14 nü "Two Wheeler Rally For Road Safety" sentong ka ayongzüka agiogo.

Iba sentong nung rider 50 dak temai shilem agi aser Traffic Zone -I &II nungi ketdangsür aser personnel temi road safety dak sendakba nung placard tem nung tongtibang osangtem zülüa bener senzüa liasü. Road safety

dak sendakba nung nüburtem nem tangazükba agütsütsü aser gari anishirtem tekümsükba kübok gari anishitsü atema ajungmesotsü nukjidong nung iba sentong ayongzüka liasü.

Iba rally ya Deputy Commissioner Dimapur, Rajesh Soundararajan IAS-i state stadium Dimapur nungi tenzüksü aser iba sülen Dimapur aser NH-29 ayimjema senzüba sülen Traffic control zone -II Chumoukedima nung tembanga liasü.

Longleng nung medical camp katsü

Dimapur, Luroi/August 14 (TYO): 75buba Indian Independence Day nüngtem nung Mahila Shakti Kandra aser Health & Family Welfare Longleng den longjemer District Administration-i, August 14 nü Bautung Higher Secondary School, Longleng nung tetsür chanutem aser tetsürtem atema angati temang tendangtsüba sentong ka ayongzüka katsüogo.

Kasa mapang nung iba sentong den repsema Beti Bachao Beti Padhao (BBBP) sentong kübok arishi küm ka tekübok tetsür kinü tanurtem

healthy baby show tetoktepba ka ayongzüka agia liasü.

Iba tetoktepba nung kinü tanur 63-i shilem agi aser Henyei Phom-i iba tetoktepba koka liasü. Tetoktepba nungsa Zuthonglo aser Chuya nati tanabuba aser tasembuba jenjang nguteta liasü.

Maneni kasa anogo tetsür aser tetsür tanur 72 temang tendangja liasü. SMO, Dr. Ademla lenisüba nung Medical team-i temang tendangtsü aser tetoktepba nung tetendangerji Dr. Yopovino MD Pathology liasü.



Mokokchung Police aser Mokokchung Forest Division na lungjemer yangluba lane divider/ Road barricade Aug 14, 2021 nü Mokokchung D.C, Limawabang Jamir-i Mokokchung S.P Vishal IPS densema Mokokchung police point nung lapoktsüdang tangokba noksa nung angur. Iba mapatong ya tongtibangsa town tobur jungdaksüba den külemi alima tzü mopung kümzüka aser wazüka ayuba aser traffic ozüng shitak benshidaktsütsü asoshi osang perokshitsü nukjidong yur tenzüka lir, ta Mokokchung Addl. SP, Imtimeren-i iba osangbener den jembidang metetdaksü. Lane divider nungji naro tema lir aser yangji tatishitsü aketba painting balala yoka lir aser iba barricades ji Mokokchiung Town Baptist Arogo Youth Department-i anepalutsü. Mokokchung DC-i mapang tatsüka jembidang, nüburtemi iba ya angateta junga anepalutsü asoshi tayongzüka ka agütsü.

AASU-i BVFCL lapoktsü takhangba agüja lungkak ait

Dibrugarh, August 14, 2021 (Agencies): Honibarnü All Assam Students' Union (AASU)-i Namrup nung ghonda 24 lungkak aitba sentong ka ayonga agiogo.

Brahmaputra Valley Fertiliser Corporation Limited (BVFCL) indang plant pezübuba lapoktsü takhangba agüja parnoki lungkak ait.

AASU züngsemtemi placards aser banners amer fertiliser plant asentenshia lapoktsü takhangba agütsü aser

Prime Minister Narendra Modi, union minister for chemicals and fertilisers Mansukh Mandaviya aser chief minister Himanta Biswa Sarma nunger dang mapa inyaksü mepishi.

June 26, 2006 nü taoba union fertiliser minister asür Ram Vilas Paswan-i Namrup nung fourth unit lapoktsü osang metetdakja liasü.

2018 küm Centre sorkari Rs 4,500 crore endoka fourth unit lapoktsüba molunga agizük. Ajisüaka, tanü tashi nung mapa

kecha meinyaker. BVFCL ya linük nung fertiliser industry tajungtem rongnung ka lir aser iba company ya 1969 küm tentet.

"Namrup-4 unit melapok nungbo fertiliser plant shibangtsüsa akümstü aser iba ajanga state rongsenketzüng nung takoksa tulu ajurutsü. Iba ajanga BVFCL nung permanent worker 600 aser casual employees 1,000 akoksatsü" ta AASU lennir kati ashi.

ULFA(I)-i ita 3 atema ceasefire atsülanger

Gwahati, August 14, 2021 (Agencies): Honibarnü United Liberation Front of Asom-Independent (ULFA-I)-i ita 3 atema ceasefire alitsü osang metetdaksüogo.

Parnok ya taoba ita asem tashi ceasefire nung lia aruogo.

Taküm May 15 nü ita asem atema ceasefire alitsü sangoktsübaji Covid19 wara nung ajemdaker telemtetba agiba liasü, ta ULFA(I)-i metetdaksü.

August 14, 2021 nü ita asem ceasefire temogo aser iba jagi ano ita 3 atsülanger, ta parnokisa ashi.

ULFA(I) aser sorkar tsüngda

olemteptsü molungtepba mapang ka nung ceasefire atsülangba osang metetdaksüogo.

Kasa mapang, ULFA(I)-i tesüiba kümtem ama mesüi takümbo Independence Day mokdangba kecha mayongzük.

ULFA(I) tenteter küm 40 tashi arudang taküm mezüng atema August 15 (Independence Day) memokdangtsü telemtetba agiogo.

Alima ajungalen Covid19 wara agi timtemba mapang India-i 75 buba Independence Day amongtsü, ta August 11 nü ULFA(I)-i sangdong ka nung metetdakja liasü.

75th Independence Day

Jai Hind

nang külem sensorur ajak dang Salem abener

"Linük nüjiso anguba indang 'Amrit Mahotsav' ya India nunger aika atema benjung ka lir, iba nung tatem makaba India sobaliba, nüjiso atema raraba meyipa reprangshiba aser India nüjiso ngur renlokba indang lir. Iba sentong ajanga küm 75 tashi ajangzüka arubatem alima dang sayutsü asoshi asenok nem maongka agütsür aser taruba küm 25 atema asalentong ka aser bangzüng ka renemer."

- Narendra Modi

75th Azadi Ka Amrit Mahotsav

Ministry of Information and Broadcasting
Government of India

#AmritMahotsav
Scan QR code and participate in Azadi Ka Amrit Mahotsav

Red Fort tesem nung Independence Day sentong anepdang 6:25 ako nungi Doorarshan ajanga live sayutsü.

Linük Mezüng, Teti Mezüng

davp 22201/13/0010/2122



TIR YIMYIM YIMOBILEM (EDITORIAL)

DIMAPUR AMUNGNÜ, LUROI(AUGUST) 15, 2021

Na ya tesangwa !

Laishibai ashir, asenok ajak ya tesangwa lir. Aji oda, tanü nü dang kari nü tenüung watsü mesüra wabong Tesangwa lir ta ashika asünunga naia koma bilemstsü. Ni jashia dang alir nung kodaser kü tenüung tesangwa asütsü ta nai bilemstsüa akok. Kü o aser mapa agi shinga mepeladaksütetter nung kodaser kü tenüung tesangwa asütsü ta nai rataa bilemstsüa akok. Ajisüaka, Mathi 5 : 1416 nung ashir, "Nü dak aliba tesangwaji nisungtemi angutsüsa yalokjang, idangji parnokai nai tajung inyakbaji angutsü aser kotak nung aliba tebu sentsüwangshidaksütsü." Tetezü asenok nisung shia dak tesangwa lir aser asen dak aliba tesangwa jagi amang ajak sangwadakja ayatsüla. Tesangwai inyaksüba mapaji amang sangwadaksütsü asoshi lir. Aji oda, Tsüngremi nü taküm nung iba sangwa jagi sünga lidaksüner. Iba tesangwa jagi nü dak Tsüngrem tashi alibaji tangar tsüngdang kuli südaktsüner. Iba jagi asen meketa aliba adianutem shirnok mulungjang nung tamang aser shisabolu agi sünga lir, parnok mulungjangji tesangwa agi melentsütsü. Ajisüaka, asenoki asen aliba lima ya temenen agi sünger tammangba- tammangba akümba angur. Iba ama mapang nung asenoki tammang aitsüba kija agibo tesangwa mangutsü. Alima manga akümbaji parnoka parnok shilem inyaker, anungji asenoka asenoki inyaksüba tongtibang mapabaji asenok dak aliba tesangwa tashiji tammang tashi dang nung jagi tuluba asütsüla. Kodang asen meketa tammang agi süngadokdir, tebilemstsüji amangji masü saka mesangwadaksütetbaji asütsü. Yisui asenok ajak ya alima sangwadaksürtem südaktsüner. Alima nung Tsüngrem temeim mangashidangba purtem million aika lir, item dangji asenok dak aliba tesangwaji bener oa Tsüngrem temeim metetdaksütsüla. Kodang, Yisu alimai aru, alima nung tammang jena oa adok. Alima tammangi pa tesangwaji metizüktet. Pa aolen ajaklen Tsüngrem temeimi alima meimchirtem kümzükba osang tajung sangdong, meimchirtem temulung meyip, shirangertem aneptsü, temenen purtem nem taidok agütsü aser anemsüba mapatem jakdaka arütsü. Alima temenen tammang tia nung aliba mapang kodang Tsüngremi iba limaji sangwadaksütsü asoshi Pa chir Yisu Khrista alimai yok, iba jagi alima sangwadaksü. Ibayongji, asenok ano tanaben Tsüngrem chir aküm, anungji joko asenok tammang chirtem masü tesangwa chirtem lir ta Laishibaisa ashir. Tesangwa chirtem tetezü asenok dak tesangwa lir aser iba tesangwa jagi amang tia nung aliba taküm aser kibong sangwadakja inyaksüla. Asenok dak aliba tesangwaji tangari angutsüsa asenok taküm aser kibong alitsü tim. Nü dak aliba tesangwaji tsükloker oa tangar tsüngdang sayuang ta Laishibai mashir, saka tangar nem ngudakjang ta ashir. Tetezü asenoki mesayutsü saka tangari asen dak tajung alibaji reprangtettsü. Aji oda, asenok taküm aser kibong nung tesangwa alibaji asen meketa alirtemia angutsüsa asenok Tsüngrem den teti alitsübaji kanga tongtibang asütsü. Ken agia ashir, talang nung alirtemia nü dak aliba tesangwaji angutsüsa, na alidak sangwajang. Asenok ya tesangwa, anungji taküm piyong asenok asoshi amang ya tsükchir asütsü.

OLEMSABANG

GALATIA NUNGER DANGI PAUL SHITI OKILA

- Supongnungsang

Yisu indang osang tajung prokshia ao tang, bendanger aikati aji agizük. Idangji chichiba khristan ka kümtettsü atema bendanger jagi Mosa ozüung penshitsu tim asü masü ta tasüngtangba ka adok. Pauli ibaji nüngdak mali ta o doktepba zülu. Atangji khrista nung taküm ka tamendakdakji tamangji tang lir, koba agi Tsüngrem den paji putepdaktsür. Saka Rom yimli Asia linük nung aliba Galatia arogotem nung nisung kari Paul anema nokdak; aser item nisung shir temulung meyippa arur parnokji Mosa ozüung küpboki aitba ajanga tang Tsüngrem den yimjungji yanglutettsü akok ta nokdak.

Tai tesayuba ajanga shirnoksa atsür ao, itemji shidakba tamang lenmangi tanapen meyipba anir arutsü nükla nung Pauli iba shiti zülu. Pauli bei sasa Yisu khrista tenyar ka ta temeden o shia itempur anema nokdak. Pa tenyar ka asütsü ajabaji nisung tashe agi masü, saka Tsüngrem nungi, aser pa nem nungloktsüba mapaji tongtipangsa bendangertem atema ta pai kuli agütsü. Iba sülen pai ano tamang ajanga tang meimchirtemji Tsüngrem den putepdaktsür ta sayu. Kaket tatemlenji Pauli amangbapur ka taküm jaklaliru khrista dak amangba nungi adoker ta zülu.

Mosa mapang Tsüngrem ozüung agi Israel nunger kanan limai ani aser ibaji temeshi liasü JA 11 :19 Kotak nung Tsüngrem tenlaki lapok aser tenlaki nungji tezüungzüktepba ozüung süngden angu .Gala 5 :1,4,5 Khrista mapang Pa senti zü agi meimchir nem tekümtet agütsü. Khrista angatetba agi pa dak amanger, aser tamang agi nüji kümdaktsür, Nenok ozüung agi medendaktsütsü merangertem khrista nungi pila lir; taochi nungi tsüka lir. Kechiyong tamang agi tanüla ajanga asenoki temeshiba teyimla asoshi ataa lir. Rom 1:17 Kechiyong tamang ajanga Tsüngrem tsüngdang temeden angubaji osang tajung ajanga jungkai adok, zülua aliba ama temeshipur tamang agi taküm alitsü. Habakuk 2 :4 Ajiang, pa tanüla asüküm lir, pa minting ; Saka temeshipur tamang agi taküm alitsü. Gal 3 :11,12 Saka ozüung agi Tsüngrem tsüngdang shinga memedendaktsür ta metetta lir. Kechiyong tamang agi temeshipur taküm alitsü. Saka ozüungji tamang dak metaloka mali, saka Lai nung ashir, nisung shibai ozüung mapatem tashi angaa inyaker item jagi pa taküm alitsü. Ibri 10 :37,38 kechaser kenpika tang lir, aji sür tarutsü alibaji, menua meli-e arutsü Saka temashipur tamang agi taküm alitsü, aser pai atsüungzükra, ni pa dak temulung machitsü. Zefa 2 :2-3 Temulung meyiptsü Tsüngremi mepishiba, Nenok sasa külemi sentepang ,hau, külemi sentepang, oh taaktsü maketba kin; Mopongi tsüksü oner aoba ama na maridokdang, kibuba tetsüputsü mit adokba na anema madokdang , kibuba tetsüputsü mit adokba anogo nü madaki marudang, Alima nung ajemalur nenok ajak shirnoki pa o bentangba inyaker; Temeshiba pushiang, ajemaluba pushiang, ashiko Kibuba ain adokba anogo nung nenok miimpangtsü. Hab 2 : 20 Kibuba pa temeshi tenla kidang lir; Alima ajaki pa madang ola madoke liang. Anitet 40 : 34 Mepet agi sentep sükiji süpang, aser kibuba sentsüwangshi agi tekülemdak sükiji asüung. Covid 19 mapang ya tamang tongpang lir, Tekülem shibangra tesasatsü, lapokra betsaprong tetsüpu melie tamang agi Tsüngremji külemstsü sangoktsütsüla ta angateter. Taz 4 : 2;12:32, JA 22:18,19 Kibuba nenok Tsüngremi melaba koba nenok nem agütsür idakji nenoki tali mependenloktsüla ,mesüra iba nungi nenoki meindoktsüla. iba ainker shin o tem nungi langka endokra, Tsüngremi pa shilem endoktsü Taz 28:15 Tanü ni nenok nem agütsüba Kibubai melaba aser pa telatet ozüung ajak beshitsu asoshi nü Tsüngrem ola mangali süra, item atakatem ajak nü tangi arutsü. Alima tesüm külen merok mi agi arem ajak rongdoker, külen raratepber, külen tzümetsüung agi okrongtepber, külen ali kongrepber alu meyimteter aser tajemtsü tzü mangur, külen menokmenok agi, külen anentsü agi anenbanger, aser alima kinük pezü Covid 19 pandemic agi tanen mekae shirangtepba sümar. Tsüngremi asentenshi jazüker Temulung meyipba Pa shidak külemti AMEN.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir

Carrie Underwood-i GMA Dove Awards nomination ana angu



Taküm April ita nung ACM awards sentong nung Carrie Underwood aser CeCe Winans nati osangtajung ken atandang tangokba noksa nung angur.

August 14, 2021: Khrista osangtajung kentener, Carrie Underwood-i Gospel Music Association (GMA) awards nominations ana nguogo; lai osangtajung kensep 'My Savior' sayaa liasü aser iba kensep nung "The Old Rugged Cross" aser "I Surrender All" ken densema lir.

Bodhbarnü GMA Dove Awards atema nominations sangdonga liasü. Underwood indang kensep 'My Savior'

ajanga Best Country/Roots/ Bluegrass Album of the Year nomination angu aser Underwood-i CeCe Winans den külemi atenba ken "Great Is Thy Faithfulness" ajanga Inspirational Recorded Song of the Year nomination angur.

2006 küm nunga Underwood-i GMA Dove Award ka ngua liasü; la indang ken "Jesus, Take The Wheel" ajanga Country Recorded Song of the Year award angu.

Yakümbö Dove Awards sentong jelia record süa liasü aser taküm iba sentong ya October 19 nü Nashville nung aliba Allen Arena nung agitsü aser October 22 aonung 8:00 ako nungi TBN nung iba sentong yoktsü.

[7:39 pm, 14/08/2021] TANGSEN Tyy: Taküm April ita nung ACM awards sentong nung Carrie Underwood aser CeCe Winans nati osangtajung ken atandang tangokba noksa nung angur.

Facebook-i sarasadem onük lemsateptsü atema 'tool' ka tenzük

August 12, 2021: Tamangertemi sarasademtsü onük balala lemsateptsü aser sarasademjang ta mepishitsü atema Facebook-i 'tool' ka tenzükogo, aser ibaji ajanga alima tesem ajungalen tamangertem online ajanga sendakteptsü.

Iba feature amshir Facebook Group balalai ashiba agi, Group nung züingsemtemi mapa interview, shirangba aser tanga onük balala atema sarasademjang ta mepishia onük balala lemsateptsü akok.

Iba sülen Facebook amshirtemi "Ni sarasademtsüogo" ta asüba button nung anemtsü akok, 'like' asütsü akok mesüra tebilemba lemsateptsü akok.

Yaküm December ita nung mezüing Facebook-i iba tool ya US nung tendang tenzükba liasü, ta facebook otongdar kati metetdaksü.

"Coronavirus wara mapang nung tamangertem aikati sendaktepa alitsü atema onok indang services amshio, anungji maneni parnok yaritsü atema onoki tools tasen tenzükba," ta facebook otongdarisa metetdaksü.

Pastor aikati facebook nung iba feature tenzükba pelaa agizükogo, aser parnok rongnung Dallas nung aliba First Baptist Church nung pastor, Robert Jeffress densema lir.

Pastor Robert Jeffres-i, "Facebook densema tanga social media sabang balala nung tools ajanga maneni Khrista osangtajung sangdongtsü akok, talisa tang ama wara mapang

nung tamangertem sendaktepa alitsü akok," ta metetdaksü.

"Tool ajakji tim mesüi amshitsü akok, ajisüaka ni iba tool tenzükba ya pelaa agizükba, kechiyong iba ya ajanga tamangertem asen nungdak mapang nung chichiba Tsüngrem ka dang tejak ashitsü," ta paisa shisem.

Facebook indang data policy kübok facebook-i osang balala bendentsü, item rongnung nija advertisements densema lir, ajisüaka advertisers-i advertisement atema nisung kati sarasademtsü atema mepishiba post mamshitetsü.

Brunswick, Ohio nung aliba St. Ambrose Arogo nung pastor, Bob Stec-i, iba tool ya nüburtemi kanga nungdakba tool ka lir, koba ajanga tamangertem sarasadem ajanga yariteptsü aser longjemer Tsüngrem külemettsü, ta ashi.

"Asenoki longjemer sarasademtsü akok. Asenoki mapang ajak nung nungitpepa alitsüla aser tayongzükba mapang ajak nung külemi jajatsüla," ta paisa ashi.

"Alima nung alir ajaki angutsüsa langka post asütsüji tim asü? Tajung anogotem nungbo asenoki pei sasa telemtetba agia inyaksü. Asenok timtem nung aliba mapang nungbo Facebook ajanga ajak dang teyari meshitsü akok," ta pai ashi.

Conway, Arkansas nung aliba Second Baptist Conway nung tetsürtem atema pastor, Jacki King-i, iba ya ajanga tang ama wara mapang nung tangar ajak den pilar alirtem kanga

tajangzük angutsü, ta ashi.

Evangelical Lutheran Arogo nung tongti putir, Paul Egensteiner-i, Facebook nung melung masütsüsa kar lir, ajisüaka sarasadem onük lemsatepa tool yabo ni pelaa agizükba, ta ashi.

Paul-isa, "Iba ya Facebook-i tamangba yimsü organization balalai inyakba mission nung yariteptsü atema inyakba mapa ka lir ta ni amanger. Facebook-isa osang tai prokba nokdangtsü atema inyaksü ni sarasademtsür," ta metetdaksü. Ano Nashville, Tennessee nung aliba Redeemer Arogo nung tongti lenir, Thomas McKenzie-ibo, ni iba tool ya sempaner, kechiyong Facebook-i sen aazüktsü atemabo ajak inyaksü, ta ashi.

"Online ajangabo nai temelung ajak agi Khrista nung amangbapurtem den shilem magitetsü. Ibaji tamakoktsü, ajisüaka item ama tool ajanga ibaji takoktsü ta nisungtemi amangtsü," ta

McKenzie-isa metetdaksü. Union of Reform Judaism Tir, Rabbi Rick Jacobs-ia, nisung karibo iba mapatong ya magizükba, ta ashi.

Vancouver, Washington nung aliba Crossroads Community Arogoi hopta ter tejaklen Facebook group ka nung iba tool amshi tenzükogo; iba Group nungji züingsem 2,500 shi lir. Iba Group nung anogo shia sarasademtsü atema mepishiba post 20-30 shi lemsateper aser post shia nung comments 30-40 shi lir, ta Ministries Executive Pastor, Gabe Moreno-i metetdaksü.

ANO GO ABEN TSÜNGREM DEN

KIBUBAI TEMULUNGJANG BUSHIR

Ni KIBUBAI temulung bushir aser temulungjang tendanger, nisung shia nem pei sentong yari, pai inyakbatem nung tajangzük yari agütsütsü asoshi.

- Yiremia 17:10

Meimchir ka taküm nung temulungjang ya kanga tongtipang lir, aser ya Tsüngrem tsüngdanga kangasa tongtipang. Tsüngremji temulungjang bushiba Tsüngrem, anungji Pai meimchir mulungjang nung temerük, ochi aser temeshiba lir mali aji bushir. "Ajak dak alaka temulungjang tekela kaba lir aser onsara majung". (Yiremia 17:9)

Yisui parnok tebilembatem meteta ashi, "Kechiba nenoki nenok mulungjang nung tamajung bilemer? (Mathi 9:4). Tsüngremi meimchir temulungjang bushi nung Pai ajak angur, Pa nungi kecha meima meyetet. Anungji nisung shiai pei inyakba yari pai agütsütsü, temulungjang nungi adokba tajung inyakerkem nem tajung agütsütsü aser tamajung inyakerkem nem tamajung agütsütsü, aser itemji asen mapa masü saka asen temulungjang lir. Kechiaser Pai temulung telongtiba nung alibajia meteter. Aji asünung asen taküm lenmangtem merüka ali asü mali ta reprangdangtsü kanga tongtipang. Meimchir temulungjang ya ajak dang tamajungtiba aser tekülaktiba asünung iba yagi taküm, kibong, lokti yimden, sobaliba aser arogo nung aiben timtem aser tamajung benoka timtemdaksür aser menena raksatsür. Aseni mapa tajung aika inyakaka asen mulungjang merükteta melira tajangzük maka. Anungji mapang ajak nung asen sasa asen mulung bushidanga tamajung tebilemba, mapatem aser shisatsü ajak indoker asen mulung ochi, temerük aser temeshiba semoker Tsüngrem den anogoshia jajadi aser aji Pai mulungba lir.

Sarasadem

Temeim Tsüngrem, kü mulungjang teraksa ya nai yanglujang aser ne tsüngdang merüka aser ochishia litettsü anogoshia nai ni yariangma. Amen

AMANGBAPUR AJAKI TSÜNGREM DANG KÜKÜA TATOK MESHITI, NI ASER NA IBA ONÜKTEM NUNGI AIBELENA LIRA

1. Nagaland for Christ tenung atemer Tsüngrem jashidaktsüba.
2. Missionary merijang ter (10000) aotsü nangzükba meinyaktetba.
3. NBCC/ABAM clean election nung arogoburtemi ochi shilem magitetba.
4. Backdoor appointment/tazungba küli kaket teyazü/tasoba küm melenshiba/sen agi mapa aliba/ tulurtemi supokrem achiba.
5. Mapai mao angati nung ita sen achiba.
6. Seniority / promotion nung ochi mashi.
7. Govt ajanga sensaker/meshimejunger nem teyari mapa nung ochi mashiba.
8. Ochi mashi rongsen agi aliba ali kimong/alu/ki ojentem/tanger tenung nung bank account tem nung sen ayuba etc.
9. Takar/tulurtemi sensaker meshimejunger dang mezüingmeshiba aser temeim/taochi mesayutetba.
10. Nuburtemi pangdak küpok melitetba.
11. Yi mayoktsü tongpangbo akok saka yi aser mozülartem taküm kikong rangpen tanüla atsüngzükba oa samaba agi tasü ita shilem magitetba.
12. Santemi tenla agütsüba rongsen agi cari alia amshiba nung tenzükba kari pei nija meyong ama amshiba.

(OH TSÜNGREM, KÜ DAK TEMULUNGJANG TEMERUK KA POKTETDAKJANG, ASER SHIDAKBA ASENTENSHI TANÜLA KA KÜ DAK POKTETDAKJANG.) T KEN 51:10

-Bendang imsong (Social Activist.)

OLONG PAITEP # 5906

	1				2	3			
4			5						6
						7			
	8								
	9			10			11		
						12			13
14									
						15			
		16							

TIPILEN		LANGTSÜNGLEN	
2. Sü jeplok	- (4)	1. _ _ _ _ i	- (4)
4. O agi merenshi	- (5)	3. Kasa masü	- (6)
7. Ayongküm li	- (5)	5. Nüchi masü	- (5)
8. Chiyungtsü mapang süiadok	- (4)	6. Tashi endok	- (5)
9. Tsüngrem den jembiba	- (9)	9. Langtem	- (5)
12. Saklok	- (4)	10. Anü malidang	- (6)
14. Samaba mebushitet	- (5)	11. _ _ _ _ _ kibur	- (5)
15. Mejanga onü	- (5)	13. Tebur tembar tsüngda	
16. Tzü shiruru ka	- (4)	jatepba	- (4)

OLONG PAITEP # 5905 TELANGZÜBA

TIPILEN :		LANGTSÜNGLEN :	
1. Semtu, 3. Lepko, 5. Bilem, 8. Ulu,		1. Sayu, 2. Teb, 4. Kimong, 6. Lungkak,	
10. Tsüngpang, 11. Tesangwa, 13. Aoksa, 15. Putir, 16. Yipru.		7. Milak, 9. Zünga, 10. Temopu, 12. Walu, 14. Ali.	

KOMA SÜLA TELANGZÜBA

Q. ABAM kübok arogotem nung sannükertem ya ABAM-i dang shimer mapang mapang shia, government mapa inyakerkem amato, mapang apir arogo balalai transfer and posting yoka tenzükdaksü nunga koma süla ?

Pastortemji Government servant tem ama yimtsüng aser Town nung transfer yoka lidaksü nungbo karbo Arogo takar aser tulutemi itasen agütsüba ama Pa or Laji yimtsüng tila Arogoibo magütsütetsü, idangji parji timtemtsü aser ano Town nung alitem jagi yimtsüng nung melenütsü aser Town arogoi ita sen agütsüba ama magütsütetsü anungji par jagi talangka melitetsü. Shi agi dang tenzükertem asoshi kanga tasak asütsü, kechiasür Full time tenzükter aika ita sen dang angatetba alitsü akok.

-SMS.MKG.

Sannükertem govt mapa inyakerkem ama transfer posting mapang apir arogo balalai yokbajibo kanga tasak asütsü, kechibasüra idakji tetsükdaksü aika keta lir saka arogo nung pastor shimba yimya yabo ABAM ajanga shimbajang tajungba asütsü kechiyong Tsüngremer sentong ama mesüi nisungi pei melungka agi yimtsür yimer apia shimba ajanga arogo Kar nungbo mepetmesüa tang alir aser nuntsüng nüburtema temoatsüa manguer .

-ns jr

ABAM kübok inyaker Pastor ajak degree apir liromedem scale latetjaa aka asübo takoktsü ka süla. Saka tang, tangbo iba tebilemba yabo takok mangutsüang südi.

-SMS

Aoli arogo nung pastortem ABAM ajanga shimra kenyongi majongtsü, percentage apibo yim tila nungang tashir tular aser semper aketer theologian timba adoker saka asen Aori yim, tsükong, kin kidong tulu-tila kanga shimdang, iba jagi telongjem / temeimtep samar aser temoatsü malir. Ano mapang shia pastor sapang melentepira kanga junger, kechiaser yim ajak nung pastorbai takar kibong metetadoker aser itemji dang sentong nung amshir aser item kibong nung dang sarasadema senzür. Saka mapang tatsütsü dang lira pai takar/sensaker shinga memetetü Tsüngrem o proktsü.

-M.A,Ao 4th mile (Maneni tapak 7 nung...)

AO OSHI ANGAZÜKDAK:

TANÜ ANGAZÜKTSÜBA OJANG



Komo

(n) teküp nung tashidak zübu keta adokba (infected wound)
* Temang nung **komo** madoktsüsa merüka alitsüla.

Konem

(adj) temulungjang tarok (introvert)
· **Konem** nisungi pei bilemba mashir.

NAI-A YA METETTER MA?

New York nung alir nisung kati second 18.45 nung soda litre 2 jemaba atema 'Guinness World Record' ajangzük tet. Eric 'Badlands' Booker-i soda litre ana ajemba video ka pa sasa tangok aser tatsüka lir Guinness World Record indang official YouTube channel nung lemsatepa liasü. YouTube sabang nung iba video lemsateper külen nungi views' million 1.5 aser likes' 55,000 dak tema ngua lir.



TANÜBO NAI LANGZÜANG

Q. Koba Ministry ajanga PM-DAKSH tenzük?
A.Ministry of Social Justice and Empowerment B.Ministry of Education
C.Ministry of Health D.Ministry of Railways

(Taruba adok nung onoki langzüsü)

YASHI ADOK TELANGZÜBA : Decathlon

SUDOKU # 5946

7	2	3							
	9		6	2	3	1			
		1	8			2		3	
5	1			2		7			
	6	2				5	9		
	4	7		3			2		
			9				6		
2			3			7	1		
4			2	5					

TELANGZUBA # 5945

5	9	3	6	8	7	4	1	2
4	1	2	5	9	3	6	8	7
6	8	7	4	1	2	5	9	3
3	5	9	7	2	6	8	4	1
8	6	4	3	5	1	7	2	9
7	2	1	9	4	8	3	5	6
1	3	5	8	7	9	2	6	4
9	4	6	2	3	5	1	7	8
2	7	8	1	6	4	9	3	5

OJANG LUTEP # 5491

- EMRTAJEPBA :
- ATI :
- UNGN :
- NGBENAJUA :
- GDAN :
- TNGRSÜEMI :
- NBATAMARE :
- JAJENNG :
- TIKA :
- NGKAJUET :

OJANG LUTEP TELANGZÜBA # 5490

TSÜNGREMER SENTONG MEJANGJAI ASEN MULUNGKA NUNG JAJADANG TESAMA TIA AJURUR

TAN HOPTA ATEMA - KOMA SÜLA ?

Q. Clean election takok angutsü atema voter shia dangi "ni' vote mayoktsü" ta sign südaktsüyonga Signature campaign sentong ka agia ao nunga koma süla ?

August 30 nü Sonia Gandhi leniba nung opposition senden amentsü

New Delhi, August 14 (Agencies): August 30, 2021 nü Congress Tir, Sonia Gandhi leniba nung opposition party balala nungi lenirtem senden amentsü.

Iba senden ya video conferencing ajanga agitsü aser senden nung NCP Tir, Sharad Pawar aser Trinamool Congress tongti, Mamata Banerjee na densema opposition lenir aika adentsü.

Senden nungji opposition tashi itshitsü atema jembitsü aser onük balala nung o lemteptsü.

Osang angazükba agi, iba senden nungji Congress-i yimsüsüba state tem nung Chief

Minister tem, Shiv Sena lenir Uddhav Thackeray (Maharashtra Chief Minister), DMK lenir Stalin (Tamil Nadu Chief Minister) aser Mamata (West Bengal Chief Minister) nung adentsü.

Tzüngluruwa mongpu Parliament senden nung Pegasus onük densema onük balala nung opposition party aika obang ka ser longjema liasü.

Opposition party temi sorkar dang Parliament nung Pegasus ken o benoka o lemteptsü tekong meranga akhangba ajanga House anaprongla nung senden junga magiteti tembang, aser iba ya opposition-i takok ka ama züngshir.

2019 küm Centre nung maneni BJP-i aniba NDA sorkar aruba sülen opposition melongjemteti liasü, saka tang mezüng opposition party tem obang ka ser longjemer.

Opposition party 15-i parnok longjemba tashi taitba akümtsü atema bangjemogo, ajisüaka tang tashi nungbo Centre nung BJP sorkar anema party tem lokteptsü atemabo melemtet.

Taküm West Bengal assembly election nung TMC-i BJP madak takok tulu anguba ajanga opposition nem teimla agütsü, ajisüaka Congress lenir, Rahul Gandhi leniba nung ayongzükba sentongtem nung adentsü TMC-i memelunger.

Ladakh nung China sepai den rarar ITBP 20 nem medal agütsü

New Delhi, Luroi/August 14 (Agencies): India nung Independence Day atongtsü anogo ka jelia Honibarnü Indo-Tibetan Border Police (ITBP) sepai aika nem gallantry medals agütsüogo.

Yaküm May-June ita nung anüdoklen Ladakh nung China nung PLA sepaitem den rarar ITBP sepai 23 nungi parnok 20-i tasü itta raraba atema medals agütsü.

Yaküm June ita nung Galwan Nala nung China nung sepaitem den raraba mapang nung ITBP sepai 20-i taküm tenla agütsü.

Honibarnü ITBP-i, tang mezüng parnoki Police Medals for Gallantry (PMG) timtiba angur, ta ashi.

ITBP sepai 8 nem Police Medals for Gallantry agütsü; yaküm June 15 nü Galwan Nala nung linük atema raradang parnoki taküm tenla agütsü; ITBP sepai 6-i May 18 nü Finger 4 area nung linük atema raradang taküm tenla agütsü aser May 18 nüsa Ladakh kübok Hot Springs anasa China sepaitem den raradang ITBP sepai 6-i taküm tenla agütsü.

ITBP sepai aseme Chhattisgarh nung Maoists telungpurtem den raradang taküm tenla agütsü, aser par asem nem-a PMG agütsüogo, ta ITBP-i sangdong ka ajanga metedaktsü.

PMG angur sepaitemji Rinku Thapa, Sarat Kumar Tripathi, Arbind Kumar Mahato, Nitin Kumar, Manish Kumar, Patil

Sachin Mohan, Manish Kumar, Kauppasamy M, Akshay Ahuja, Dharmendra Kumar Vishwakarma, Ravindra Maharana, Shiv Shankar Tiwari, Stanzin Thinles, Vinod Kumar Sharma, Kishor Singh Bisht, Pankaj Srivastava, Ghanshyam Sahu, Ashraf Ali, Mohd Shafkat Mir aser Rigzin Dawa nung lir.

Yaküm June 15 aonung India-China arrtsülen Galwan Valley nung China aser India sepaitem teka sangshitepa raradang India nung sepai 20 asü aser aika yirua liasü.

ITBP-i Gallantry medals anguba dak alia yaküm September ita nunga ITBP sepai 300-i the DG's commendation roll & insignias sempet ngua liasü.

MENUNGRA BILEMTETER



Aso:
September 23, 1973

Asü:
August 15, 2020

ASÜR. MARAKUM AO (LONGMISA)

Na iba akümlü nungi pilar küm ka jungaka na onok den teti lir ama bilemer aser menungrar. Ne temeim mapatem onok melungjang nung teti lir. Tanü iba anogomong nung na bilemteta kinüngertemi sarasadema amonger.

-Temeim Kinüngtsü, Jala-jabaso Kinüngertem

PELABA LEMSATEPER

LT. I. ROMINA AO

Asür I. ROMINA AO (Molungkimong) mapang tatsüka shirangdang aser iba akümlü tyoktsür aoba mapang ozü aria bilema yariteper ajak dang kinungertemi pelaba metedaktsür.

Agüja alirtem dang ozüi balaka pelaba shisemer:

1. Dimapur District Task Force on COVID-19.
2. Doctors and nurses of District Hospital Dimapur.
3. Dimapur Ao Baptist Arogo.
4. Dimapur Molungkimong Senso Telongjem.
5. Dimapur Molungkimongtsür Telongjem.
6. Dimapur Molungkimong Fellowship.

Tulusang Tsüngremi nenok ajak molamoshia moajang ta ozüi sarasademtsür.

- Temeim Jala, Oba, aser Adianu aser kinungertem



Aso: 07.02.1970
Asü: 04.08.2021

India nung ano nisung 38,667 dak Covid putet aser 478 asü

New Delhi, August 14 (Agencies): India nung ano nisung 38,667 dak coronavirus putet aser tang tashi nungbo linük nung nisung ajak senteper 3,21,56,493 dak iba tashidak putetogo, ta Honibarnü Union health ministry-i metedaktsü.

Tesüiba ghonda 24 tsüngda coronavirus agi shiranger 478 asü aser tang tashi nung iba tashidak agi shiranger ajak senteper 4,30,732 süogo.

"Tesüiba anogo 48 tashi linük nung anogo shia nisung 50,000 den tajemba dak iba tashidak puteta arudar. Iba ya Centre, states aser UTs-i longjemer meranga inyakba ajanga lir," ta Health Ministry-i sangdong ka ajanga metedaktsü.

Tang India nung coronavirus agi teshirangdakpur 3,87,673 dang lir, aser ibaji coronavirus caseload nungi shilem 1.21 dang lir.

Honibarnep 7:00 ako tashi nung India nung coronavirus vaccine dose crore 53 (53,61,89,903)

agütsüogo, aser iba nungji tesüiba ghonda 24 tsüngda dose 63,80,937 agütsüba densema lir.

Hokolbarnü samples 22,29,798 tendanga liasü aser tang tashi nung samples ajak senteperbo 49,17,00,577 tendangogo, ta ICMR-i metedaktsü.

Mongolbarnü Central sorkari, linük nung coronavirus wara kanga süngjemdar, ajisüaka tesüiba hopta ana tashi state 9 kübok district 37 nungbo anogo shia coronavirus case timba putetdar, aser item districts rongnung Kerala nung district 11 aser Tamil Nadu nung district tenet densema lir, ta metedaktsü.

Central sorkari, August 9, 2021 anogo tashi nung India nung sample 86 nung SARS-CoV-2 indang Delta Plus variant putetogo aser item rongnung Maharashtra nung sample 34 nung Delta variant putetba densema lir, ta metedaktsü.

GOVERNMENT OF NAGALAND HOME DEPARTMENT GENERAL ADMINISTRATIVE BRANCH-II

No. GAB/GEN-4/2021

Kohima, dated, the 14th August, 2021

PRESS RELEASE

This is to inform that the state level function for the celebration of the 75th independence day being held at the Nagaland Civil Secretariat Plaza, Kohima on 15th August 2021 (Sunday), 08:45 AM onwards, will also be live streamed on the MyGovNagaland's YouTube Channel.

Intrested viewers can watch the event online on YouTube and Facebook by visiting the MyGovNagaland's page or by directly clicking on <https://www.youtube.com/watch?v=QA2vdoeWsh0>

(NUSIETA RHAKHO)

Additional Secretary to Govt. Of Nagaland

GOVERNMENT OF NAGALAND DIRECTORATE OF ART AND CULTURE NAGALAND : : KOHIMA.

NO.AC/PC/3/2019-20

Dated Kohima, the th Aug. 2021

ADVERTISEMENT

PHOTOGRAPHY COMPETITION ON THE THEME 'LANGUAGE OF TEXTILES'

In compliance to Home Department letter NO.HOME/SCST-7/2014 dated 9th August, 2021, the four recognized tribes of Nagaland, namely- Garo, Mikir, Kuki and Kachari are invited to participate in the photography competition organized by the Department of Art and Culture, in commemoration of 75 years of India's Independence on the theme 'Language of Textiles'

Besides, in reference to the earlier advertisement, the following recognized Naga Tribes- Angami, Ao, Chang, Khiamniungan, Konyak, Rengma, Sangtam, Sumi, Yimchunger and Zeliang are re-invited to participate in the Photography competition.

Applicants with the same criteria as advertised in the local dailies vide No.AC/PC/3/2019-20 dated Kohima, the 25th June, 2021 can submit their applications on or before 31st August, 2021.

(ADELA MOA)

Director,
Art and Culture, Nagaland, Kohima.

KOMA SÜLA TELANGZÜBA

(Maneni tapak 6 nungi...)

Tang aliba yasa tajungba asütsü ta bilemer. ABAM-i repranga transfer and posting inyak nungbo sannüker ajak Molomi aotsu südi. Kichiba süra parnok linüdak alitsü atema süpokrem amshia inyaksü südi.

-Lima Aier, Lengrijan Dimapur

Nagaland nunga association aika nung Pastortem centeri Arogo melentepa term yur inyakba angur. Saka tanü asen Aortembo yamaji masü iba jagi sannüker aika yimsüng. Arogo tilala nung küm aika inyaka aru sempetbo tajung saka nüburi lakteter jangratema malir kechiba süra Arogo tulu aser tajung nung inyakertemi sodi memeshir. Anungji tangar ama asen Ao Arogotem nunga tangar inyakba ama tangatetba tajung nung aser ABAMI acha ayanga inyak nung sannükertem ajak arok ajungtsü ama bilema ni kü tebilemba ka lemsateper.

- WhatsApp

Küm ter nung ken yamaji melentepa tenzük nung kanga ajungtsü. Ajak asoshi timtimji tilateribo ajurutsü akok. Saka aon melenshia chiyongba ama kensü osü melenshia aser Pastor tema nüburtem den melentepa tajung tamajung ajakji ajangshia aodangji Pa/la asoshi temelenshitsu, tangazüktsü aser temoatsüa aika iba nung ya keta lir. Arogo aika nung Pastorji kanga dang bendanga agüja tenzükba, Tsüngrem o nung mongin aser Arogo ka tenyaksü shidak angateta nüburtem tzüra temdakja aniba angur. Anungji yamala Pastor sempet aketba tenzük ka ajanga tanela nung moksepa aliba Arogo purtem den ken oa tenzükaktsü nung nüburtem asoshi koda jungla.

-IK Dmr

Linük nung azütokshiba anendaktsütsü: Afghan tir Ghani



Taliban-i Honibarnü Afghanistan anüdoctip nung taoba warlord temi kümzüka aruba yimti Mazar-e-Sharif amak. Sokar ketdangsür kati ashiba agi, Taliban-i Mazar-e-Sharif yimti ya tesem balala nungi amak aser iba ajanga yimti tezülen rara tulu adoka liasü.

Kabul, Luroi/August 14 (Agencies): Afghan tir Ashraf Ghani-i Honibarnü lisopurtem dang linük nung azü tokshiba anendaktsütsü aser nüburttem tesem balalai jenshiba nokdangba den linük süngjemdaktsütsü nangzükogo. "Nenok tir ama ni linük tali mepetmesüi midaktsütsü atema rangloker inyaksü aser iba den azütokshiba aser nüburttem jenshia aoba anendaktsütsü," ta Honibarnü ashi.

Paisa, pai aniba sorkari taoba küm 20 tashi linük terenlok nung aruba ya taoba jenjangi meyipa meyoxtsü, ta ashi. "Afghanistan nung nisung tali tepsettsü atema rara, taoba küm 20 tsüingda ajangzükur alibatem raksatsü ailba aser

nüburttem meyong kiojen aser osettsüt balala raksatsü memelatsü," ta pai ashi.

Ghani tatemsa Bodhbarnü Mazar-e-Sharif yimti nung yimjak nung nokdaka liasü. Iba yimti ya Taliban-i Honibarnü maka liasü.

Osang balala ajanga Ghani Honibarnü nüburttem den jembiba mapang mapa nungi anentsü akok ta sangdonga liasü, ajisüaka Afghan tir-i pa mapa nungi anentsü indang kecha mebenok mesera iba osang indang kecha mejembi.

Afghan tir-i, pai fghanistan nung mepetmesü tulu adoker aliba anendaktsütsü atema stakeholder tem den sensaksem tenzükogo ta ashi. "Ni sorkar yongtsü nung lenir

tejentem den, yimden yimsüsürtem, nüburttem tenüing nung nokdakba lenirtem aser bendanger tembartem den yimsüsüba tsütsü ken o bentettsü atema sensak asem tenzükogo, kong Afghanistan nung yimjung asoshi benokogo," ta Ghani-i ashi.

Taliban-i, Afghanistan anüdoctip, anüolen aser anüoletip nung tesem timba atsüingogo aser US-i Afghan sorkar tamendakdak Kabul anogo 90 tsüingda chireptsü ta asatetogo. Sorkar sepaitem tang Kabul nungi anüoletip len kilometer 11 dang pilar Taliban den raradar aser kasa mapang nung August 31 nü tashi nungbo US sepaitem atsüingintsü renemtepdar.

Covid-19: Guatemala-i state of emergency sangdongogo

Guatemala City, Luroi/August 14 (Agencies): Delta variant ajanga Covid tashidak menar tali küma aoba mapang ka nung Guatemala-i state of emergency benokogo aser Deobar aonung nungi tenzükura curfew benoktsü, ta tir Alejandro Giammattei-i ashi.

Delta variant ajanga tashidak menar tali küma aoba agi anogo 30 atema state of emergency benokogo, ta Giammattei-i Hokolbarnü ashi.

"Delta variant ya kanga kara menatepyonga aoer. Iba ajanga tashidak poktetshioigo aser sorkari tashidak aziüktsü atema nüburttem nem tenokdangba

tasen agütsüigo. Guatemala ya tangar dang nungi balaka masü," ta pai ashi.

Guatemala nung nütsüingyongsük million 17 shi lir aser iba linük nung anogo ka nung nisung 4,000 dak tem daka tashidak potetogo. Wara poktetba sülen tang tashi nung nisung 407,564 dak tashidak potetogo asre nisung 11,006 süigo. State of emergency koba Congress-i agizükogo, iba kübok Deobar aonung nungi tenzükura 10:00 ako nungi anepdang 4:00 ako tashi curfew benoktsü.

Tetuyuba tasen agütsütsü asoshi telemtetba agiba kübok wara den raratsü atema

tenüingdak osettem takaraba nung alitsü, tenüingdakba osettem nung minimum aser maximum jenjang atakzüktsütsü aser lokti adenshitsu memelatsü. Ajisüaka lokti nung tetsüingta ita inyaksangshitetba sentongtembo agidaktsütsü.

"Item jenjangtem ya tashidak aziüktsü atema agiogo," ta tir-i ashi. Ochi mashi ken o balala aser wara aziükba yimya meshidakba ajanga Tir anema yimtung nung longkak aita arudar.

Pai taoba küm March ita Guatemala nung mezüingbuba Covid tashidak potetba mapang state of emergency ka benoka liasü.

Covid-19 poktetba sülen Israel-i tang mezüingbuba Gaza crossing lapoktsütsü

Jerusalem, Luroi/August 14 (Agencies): Israel-i Deobarnü arrotsü nung Hamas-i yimsü asüba Gaza Strip den sendaktepba tesem ka lapoktsütsü aser iba ajanga shishilembartem noklang aika Israel-i aittsü atema melatsü. Taoba küm March ita Covid-19 wara poktetba sülen tang mezüingbuba iba tesem lapoktsür.

Iba jenjang agiba ajanga Erez crossing adena shishilembar 1000 aser Gaza nungi shishilembar tejen 350 senzüsenpongtsü melatsü, ta Defense Ministry sangdong ka ajanga metetdaksü. Ajisüaka vaccine agir alirtem mesera Covid-19 tashidak aneper

alirtem dang arrotsü adentsü melatsü.

Kasa mapang nung Gaza anüolen tip nung Kerem Shalom crossing nunga shishilembaba atsülangshitsü, kong tzi aser sewage amala humanitarian infrastructure atema hadir aser osettem belenshiba densema lir.

May ita Israel sepai aser Hamas na tsüingda anogo 11 raraba mapang Gaza nung alir 243 aser Israel nung 12 asü. World Bank-i, rara nung teraksatsüba balala adokba ya küm ana tsüingda USD million 485 intoka-ang yanglushitetsü ta asatetogo. Gaza nung alir shilem 60 bo chiyongtsü teperi mangur, pa World Bank-isa ashi.

Turkeytzümetsüing lendongnung nisung 40 süigo



Tzümetsüing ajanga ki raksaba yangi noksa nung angur.

Istanbul, Luroi/August 14 (Agencies): Turkey tzüküm nung tzümetsüing aser anentsüh lendong nung asür nisung 40 jungogo, ta linük emergency & disaster agency-i Honibarnü metetdaksü.

Tzüinglu kanga sashia aruba ajanga Black Sea province tem; Bartın, Kastamonu aser Sinop nung tzümetsü aru aser iba ajanga ki raksatsüba den apu pongu raksatsü, garitem apunger ao aser lenmang aika nung tesenzü mejungi kümogo. Turkish disaster agency AFAD-i ashiba agi, iba lendong nung Kastamonunung nisung 34 aser Sinop nung nisung trok süigo, ta metetdaksü.

Sinop nung nisung teku mozükidang temang anepaludar aser Bartın province nung nisung ka samara bushidar, ta agency-isa metetdaksü. Ajisüaka iba tesem nung alirtem kari social media nung ashiba agi, nisung noklang aika samara bushidar. Kasa osang ya opposition MP katia metetdakja liasü.

Tang tashi nung iba tesem nungi nisung 2,250 shi aninogo. Parnok karbok kilem kolak nung lia helicopter temi anir ao aser nisung aika khen atema kaketshirtem alidak jenoka lir, ta ketdangsürtemi ashi.

Climate scientists unequivocally-i ashiba agi, tzümopung melenshiba ajanga tsüingsang mopung kanga tamajungba kümogo, kechiyong nagmati, totzi aser natural gas arongba ajanga alima tatsükba kümogo. Alima tatsükba küma

aoba mapang iba amala tsüingsangmopung ya tali tali adoktsü imlar, ta parnokisa ashi.

Kasa mapang nung Turkey nung mongintemi ashiba agi, ayong ayimba nung minprongba aser kiojen amala shidak meyangluba ajanga Turkey nung tzümetsüing agi teraksatsüba tulu adokdaktsüigo.

Geologists temi ashiba agi, kiojen/apu ama yangluba ajanga ayongküm aser Kastamonu, Bozkurt district nung Ezine ayong alluvial flood plain tilaba kümdaktsüigo, kong teraksatsüba tulu adokogo. Iba tesem nung nisung talidak ki ayong küm nung yanglua lir, ta parnokisa ashi.

Tzüinglu kanga sashia aruba mapang ayong nung tzi sadem sadema mayimer aser iba ajanga ayong moshia ayimer. Tzümetsüing aruba tesem nung alirtemi video lemsatepba nung Bozkurt nung tzi ayonglang leni yima aluba nguogo aser iba ajanga ki aser lenmangtem metsünga liasü.

Geologist, Ramazan Demirtas-i, Ayong nung tzi ayimdak tilaba küma aoba indang Twitter nung rasaa shiogo aser ashiba agi, item lendong atalokba ya meimchirtem tia lir.

Turkey kübok Mugla aser Antalya nung morokmi kanga sashia oya aliba mapang tang tzümetsüing agi kongshioigo. Morokmi lendong nung nisung ti süigo aser iba tesem nung alirtem meyirejang aika pei ki toktsür jenshia aotsüsa aküm.



Japan, Fukuoka prefecture kübok Kurume tesem nung tzümetsüing agi kongshir alirtem tekümkürttemi rong amshia aninba noksa nung angur. Tzüinglu kanga sashia aruba ajanga Hokolbarnü Japan anüoletip nung anentsüh alu aser nisung kar anenbanga liasü aser ano iba tesem nung tzümetsüing aser anentsüh alutsü tekümdangtsü metetdaktsüigo.

PROGRAMME FOR CELEBRATION OF
75th INDEPENDENCE DAY, 2021
AT NAGALAND CIVIL SECRETARIAT PLAZA, KOHIMA

0600 hrs : Hoisting of National Flag in all Government Offices, Institute Public & Private Buildings

0850 hrs : Review of Parade by DGP, Nagaland

0900 hrs : 1. Hon'ble Chief Minister arrives, hoists the National Flag takes the Rashtriya Salute and inspects the Parade
2. Address by the Hon'ble Chief Minister
3. Presentation of Awards
4. March Past

PARADE CONTINGENTS :

1. 1 Assam Rifles Bn.
2. 78th CRPF Bn.
3. 37th BSF
4. DEF, Kohima
5. 4th NAP Bn.
6. 10th NAP (IR) Bn.
7. 15th NAP (IR) Mahila Bn.
8. STF
9. Home Guards & Civil Defence
10. Nagaland Police Central Brass Band, PTS
11. 14 Assam Rifles Pipe Band

Parade Commander : SHRI NIKHO VENUH, NPS
Dy. Comdt. 10th NAP (IR)

Second-in-Command : SMTI. MEDEMKALA TZUDIR, NPS
Asstt. Comdt. 15th NAP (IR) Mh. Bn.

CULTURAL PRESENTATION/ENTERTAINMENT :

1. Vande Mataram : Song
2. Ode to My Motherland : Song
3. Teri Mitti : Song & Dance Display

4. Cultural Troupes :

- a. Old Shena Cultural Club Kohima (Sumi)
- b. Pochury Cultural Club Kohima (Pochury)
- c. Zhavame Union Kohima (Chakhesang)
- d. Aong Reju Cultural Organization Kohima (Ao)
- e. Jakhama Youth Cultural Club (Angami)

1200 hrs : Governor's "At Home" - By Invitation

EVENING PROGRAMME AT SECRETARIAT PLAZA

1600 hrs : Prize Distribution

1630 hrs : Band Display

1. Nagaland Police Central Brass Band, PTS
2. 14 Assam Rifles Pipe Band

Beating of Retreat

OFFICE OF THE
MEDEMSANGER PUTU MERANGKONG

P.O TULI, DIST. MOKOKCHUNG : NAGALAND

SANGDONGER

Merangkong Senso Telongjem Mokokchung-i Medemsanger Putu Merangkong dang temelaba agir (Approval of Manuscript) "Merangkong Nungo" nungja jar kaket ka adok. Saka temelaba agiba dak alaka otsü tai aika bendenloka adok nung Medemsanger Putu Merangkong-i parnok tai alang Nashi temeichi 3 (3) chir iba kaket tanü 09/08/2021 anogo nung teti asoshi shibangtsür. (Censored and Banned)

Anungji iba otsü kaket nung zülua aliba ocet ka danga agiteta kuli aser tatishitsü amshitsü asoshi tang aser tarutsü nunga memelar.

Iba kaket shibangtsüba nung shibai aibelendir Putu-i tasungdangba den senshi tulu alitsü ta nübur ajak dang sangdonger.

Putu Tenung nung

Lemzung
13-08-2021

Lemzungchiba Jamir

Secretary

Medemsanger Putu Merangkong

PELABA LEMSATEPER

*"Tenung tajungji senti mozü dang tajungba aser
tasü nüji tasonü dang tajungba."*

- Sayutsüngir 7:1



15.08.1930 – 02.08.2021

*Onoki kodanga mamatetba obala asür
I. MERENKABA JAMIR (Merangkong). Pa
shirangba anogo nungi tasüba anogo tashi kija,
kibong, tembar, kiyonger, arogo, yimten, lokti
balala nungi shirnokisa sarasadem, nübo, rongsen,
shisatsü agi ozü kibong den yaritepogo nenok ajak
dang kanga pelaba lemsateper. Nenok ajak dangi
tsüngdong arua melemsateptetaka asen Tsüngremi
nenok ajak moajang ta sarasadem.*

**Temeim Kinungtsü Chirnur,
Semchir & Kinungertem**

Nagaland Police-i National Flag Rally ayongzük

Kohima, Luroi/August 14, 2021
(TYO): 75buba Independence Day nungtem nung, Honibarnü, Nagaland Police-i Kohima nung National Flag Rally ayonga "Azadi Ka Amrit Mahotsav" mungogo.

Iba Flag Rally sentong ya Secretariat Plaza nungi tenzük aser Police Head Headquarters nung tembangba liasü.

Rally tembangba tesem nung, DGP Nagaland T. John Longkumer-i, tanü iba sentong ajanga asenoki India nüjiso atema raratem bilemteta akhüm agütsür, ta ashi.

"India nüjiso atema parnoki telongjem nung pei taküm bendanga agütsür nokdakba bilemteta akhüm agütsür. Parnok dak pei Linük meimba tanela tulu yur inyakba atema asenoki akhüm agütsür," ta pai ashi.

Küm 200 shi British yimsüsüba mapang, linük tesem ajanga nung nüjiso atema rarar taküm aika samaba asenoki otsü ajanga angashiogo, ta DGP-i ashi.

Naga nunger British yimsüsüba kübok melidaktsüsü aser iba talenba nungi chioktsü nükjidong nung Nagaland nungi Hai pou Jadonang-i 'Riphen' ta nungja agütsüba telok ka ayongden, ta Longkumer-i telok den lemsatep.

British yimsüsüba anema nokdakba atema, 1931 küm February 19 nü Jadonang arishi küm 26 alidang, pa apu aser alenseta südaktsü. India nüjiso atema pai taküm tenla agütsü, ta Longkumer-i ashi.

Longkumer-i, putiotsü nung India nunger nüjiso atema raraba mapatong ya tesüngmangtsüka lir, kechiyong iba ya ajanga 'non-violent movement' tenzük, ta 'Father

of Nation', Mahatma Gandhi-i anir yimji-yimjung nung India nüjiso atema inyakba yimdangi arua telok den lemsatep.

Gandhi indang 'Satyagraha' asalentong ajanga ochi aser tangar nem timtem magütsüba (non-violence) tashi sayuogo aser iba mapatong nung Sardar Vallabh Bhai Patel-i Gandhi pusema liasü, ta pai ashi.

Linük nüjiso atema raratem külem sensopur asoshi iba mangdang (nüjiso) ataloktsü aser tatema 1947 küm August 15 nü British yimli talenba/yimsüsüba nungi India chiok, ta pai ashi; aser India constitution tasenba (nüjiso ngur sülen) kübok, 1963 küm December 1 nü Nagaland ya Indian Union indang State 16buba aküm, ta pai shisem.

"Tanü asenoki, linük nüjiso atema raratem nem akhüm agütsüba ajanga, tarutsü anogo/mapang tajungba asoshi parnoki taküm bendanga agütsür inyakbatem asenoki bilemteter. Tarutsü nung teimla, yimji-yimjung aser telongjem asoshi parnoki inyaktüsügo, ta pai ashi.

India nüjisongur küm 75 ajungba benjongmung amungba den külemi, tang linük nung nübur ajak Covid-19 anema raraba tensa ka nung lidaki, ta pai ashi.

Iba tongbangrara (Covid-19 wara) koktettsü atema, lokti ajak ka küma longjemer amalitepa inyaktüsü, ta Longkumer-i ashi.

"Linük nung külem sensopur ajak iba tesashi wara nungi kümzüka yutsütsü asoshi, asenok tsüngda telongjem nung kati ka asoshi aria bilemtüsüla aser tekümdangtsü meratem nung anidaktsüla," ta Longkumer-isa ashi.

World Archery Youth Championships: India team-i goal medal 3 angu



Wroclaw, Luroi/August 14, 2021: World Youth Archery Championship - Compound Cadet Under 18 Women's team final nung gold medal angur India tsür (abilen nungi) Parneet Kaur, Priya Gurjar aser Ridhu Senthilkumar nung kulemi tangokba noksa ka yangi angur.

Wroclaw, Luroi/August 14, 2021 (Agencies): Honibarnü, Wroclaw kübok World Archery Youth Championships - Compound Cadet tetsür aser tebur aser temeyoktep team asayamung nung India team-i medal asem nguogo. Iba tetoktepba final nung,

India tetsür team-i point 228 agi Turkey (216) tetsür team tsükdaktsür sülen gold medal angu. Kasa asayamung cadet men's team final tetoktepba nunga India tebur team-i USA tsükdaktsü. Temeyoktep asaya nung, India nung Parneet Kaur,

Priya Gurjar aser Ridhi Varshini nungeri Turkey madak takok angu

India cadet men's team nungi Kushal Dalal, Sahil Chaudhary aser Nitin Apar nungeri 233 agi top seeds USA (231) tsükdakja liasü.

August 10, 2021 nu, World Archery Youth Championships qualification stage asayaba mapang, India tetsür compound archery team aser temeyoktep team nati otsüsüsüsa junior (U-18) world record yanglua liasü.

India tsür Priya Gurjar-i individual pole' atema point 696 angu aser Parneet Kaur o Ridhu Senthilkumar na sentepa point 2067/2160 ngua lir. Parnoki point 22 agi women's team world record ajangetogo.

Taoba record USA-i bona liasü. Parnoki point 2045/2160 shi ngutet.

Team asayamung - recurve aser compound category - cadet aser junior nung India nung archer tebur aser tetsür team anaprongla final pezü tashi tongteta asayaogo.

T20 World Cup: ICC-i team shia nungi asayar 15 melar

New Delhi, Luroi/August 14, 2021 (Agencies): Aruya aliba T20 World Cup, koba UAE nung asayatsü sentong lir, iba asayamung atema shilem agitsü alir linük nungi asayar 15 aser ketdangsur 8 arutsü asoshi International Cricket Council (ICC)-i melaogo.

Pakistan Cricket Board (PCB) indang ketdangsur kati, shilem agitsüpur team temi coach aser support staff densema asayar 15 aser ketdangsur 8 tenung agitsütsü atema September 10 tashi ICC-i mapang latetja lir, ta osang jangjatsüogo.

"Covid-19 wara süshia maoba asangteta aser bio-secure bubble ajanga ICC-i shilem agitsüpur linük ajak dang squad nung asayar talila bendenloksü asoshi melaogo,

saka tim board temi asayar talila atema (15 dak tema anir arutsüsa kümra) senzüsönongba taa achaayangtsüla," ta ketdangsur i ashi.

"ICC-i asayar 15 aser ketdangsur 8 atema senotsü agitsütsü," ta pai ashi.

Kanga dang yongya ataba T20 World Cup, koba 2016 küm asayar külen nungi taküm mezüng asayatsü sentong renemdar, iba asayamung October 17 nungi tenzüka November 14, 2021 tashi Oman aser UAE kübok yimti asem Dubai, Abu Dhabi aser Sharjah nung asayatsü.

T20 World Cup atema, Bangladesh, Sri Lanka aser Ireland densema linük 8 qualifying asayamung ya Oman aser UAE kübok tesem ka nung September 23, 2021 tashi

asayatsü.

Super-12 stage, koba UAE nung September 24 nungi tenzüka asayatsü, iba stage atema team pezü temsüa aküimtsü.

"COVID-19 tensa asadanga, team shia nung asayar talila bendenloksü asoshi board-i telemtetba agitsü, kechiyong asayar kar danga Covid positive putet mesüra asaya mapang yirura, team temi item asayar melen squad nungi tanga asayar anioktsü akok," ta ketdangsur i ashi.

Team ajak atema quarantine period tenzüksü anogo pungo lia, Board temi pei pei squad nung asayartem melenshitsu akok, ta ICC-i metetdaksüogo.

"Ajisüaka, September 10, 2021 tashi nungbo Board temi pei pei squad yoktsüla," ta kasa sangdong nung shia lir.

'The Hundred' nung Faf Du Plessis masayatsü

New Delhi, Luroi/August 14, 2021 (Agencies): England Cricket indang tetoktepba tasen - 'The Hundred' season tanünga nung South Africa nung Faf du Plessis masayatetsü. Pakistan Super League asayaba mapang, Faf aoksa süja ao aser pa timtem agi tanaben kangshiba ajanga aruya aliba asayamung nung shilem magitetsü, ta sangdong ka ajanga metetdaksü.

Team shia ball 100 (noklang ka ka) asayaba asayamung nung mezüng game asem tashi nung shilem magitetba sülen Du Plessis asayatsü akok ta imlaa ata. Australia nung Aaron Finch melen Northern Superchargers indang captain inyaksü asoshi Du Plessis shima liasü.

Ajisüaka, arishi küm 37 tain Du Plessis-i iba asayamung nung khen danga asayadanga mali aser Hokolbarnü Instagram nung, Du Plessis-i, South Africa-i meyipa aor, saka taküm indang Caribbean Premier League T20, koba August 26, 2021 nungi tenzüker iba asayamung nung shilem agitsü tebilemba lir, ta lemsatep.

Du Plessis, shiba Sri Lanka nung asayatsü asoshi South Africa indang T20I squad nung maniok, pai ashiba agi, taruba küm ang 'The Hundred' asayamung nung shilem agitsü imlar.

"Ni timtema aliba mapang, kwinakati osang- ola agitepa shisatsü agi nungita yariogo, nenok ajak dang pelaba lemsateper. Tanaben cricket asaya nung shilem agitsü asoshi yongya atar" ta Du Plessis-i ashi.

"Taküm PSL asayaba mapang Faf du Plessis temang nung timtem adok aser ibaji anepalutsü asoshi pa tanaben South Africa-i oa rehab nung amungtsü. Tanünga asayamung (The Hundred) atema Plessis melen Northern Superchargers nung Dane Vilas aniokogo," ta Superchargers sangdong ajanga metetdaksü.

June ita Abu Dhabi nung Pakistan Super League T20 asayaba mapang, four' ka kümzüksü merandang Quetta Gladiators nungi külem team pur Mohammad Hasnain den Du Plessis tsüktepba sülen moapu nung pa (Plessis) süja ao. Iba sülen PSL nungi pa tukadok.

Unmukt Chand-i Silicon Valley Strikers atema asayatsü

New Delhi, Luroi/August 14, 2021 (Agencies): Unmukt Chand, shibai captain ka ama inyaka 2012 küm India-i Under-19 World Cup takok angu, United States nung 2021 season Minor League Cricket (MLC) atema pai Silicon Valley Strikers den asayatsü tenangzüktep agiogo.

Hokolbarnü, arishi küm 28 tain Unmukt-i 'Indian Cricket' nungi anenba osang sangdonga liasü. Thitemer aliba Indian Premier League (IPL) nunga pai asayaogo aser List A cricket nung pai run 4,500 dak tema yanglua lir.

Minor League Cricket Championship nung Unmukt-i Strikers tenung nungi Socal Lashings den asayatsü terenemba lir. Morgan Hill, CA kübok 'Morgan Hill Outdoor Sports Complex' nung iba championship asayatsü.

San Francisco Bay Area nung Unmukt alitsü aser United States nung cricket saisapong tsütsü terenlok lidaktsütsü nükjidong nung pai America nung cricket asayartem den asaya aser parnok nem tesayuba agitsütsü atema Major League Cricket den tenangzüktep agir asütsü.

"Cricket wadang tsütsü mera tasen ka agia American

cricket den longjemtsü mapang agi sempettsüba asoshi pelar," ta Unmukt-i ashi.

"Minor League Cricket nung Strikers atema asayatsü aser iba den külemi Bay Area nung cricket saisapong tsütsü asayar tasentem anitetsü maangka anguba atema pelar. Iba tesem nung cricket asayatsü sempet tajung alir asayar jenti lir," ta pai shisem.

Minor League Cricket Championship ya United States kübok yimti balala nungi team 27 atema ayongba national Twenty20 cricket tetoktepba asayamung ka asütsü. Taküm küm tsüklawa mongpu tetenzüklen iba asayamung tenzüka liasü.

Sangdong ka ajanga angazükba agi, tesem 26 nung game 200 dak tema asayatsü, kong asayar 400 dak tema agi iba championship nung shilem agitsü terenemba lir.

United States nung cricket saisapong tenzüksü aser ajungkettsütsü asoshi Minor League Cricket ajanga tongti shilem agitsü. Iba League ajanga Major League Cricket aser linük nungi asayar tajungtiba shimtsü asoshi United States National Team ka tentetsü lenmang lapoktsütsü.

ASU-i 75buba Naga Independence Day mungogo



Kohima, Luroi/August 14, 2021: IG Stadium Kohima nung football exhibition match asayar sülen ASU XI aser ASU Seniors XI team külemi tangokba noksa ka yangi angur.

Kohima, Luroi/August 14, 2021 (TYO): Honibarnü, IG Stadium Kohima nung Angami Students' Union (ASU)-i 75buba Naga Independence Day mungogo. Iba anogomung

nüngtem nung ASU XI aser ASU Seniors XI na tsünga football exhibition match ka asaya liasü.

ASU XI-i iba football exhibition asaya kokogo. Iba sentong agiba mapang,

Naga lima asoshi inyakertem, shirnoki Naga National Spirit aser Naga nung atema taküm bendanga agitsü inyaker, parnok bilemteta sarasademtsüogo, ta sangdong ajanga metetdaksü.

BILEMDANGANG

"Tajung rongnung tajungtiba bushidang kecha agia mata."